

ERA CRASTA

Numerò 39 · Gèr 2005

Impresi sense adreça

Visita deth Conselhèr de Trabalh e Indústria

Eth dia 11 de deseme, visitèc er Ajuntament de Vielha-Mijaran eth Conselhèr de Trabalh e Indústria dera Generalitat de Catalonha, Sr. Josep Maria Rañé, qu'anuncièc er acòrd ath quau an arribat era sua Conselheria e era empresa Gas Natural entà portar eth gas tara Val d'Aran. Aguest convèni contemple eth bastiment d'un gaseoducte de 37 Km, e permeterà conectar damb eth hilat dera empresa francesa Gas Sudoest a uns 15 Km dera frontèra.

Damb aguesta infraestructura se preten qu'era poblacion d'Aran pogue accedir ad aguest servici e per tant gaudir des ventatges d'aguesta hònt d'energia.



S U M A R I	1	Visita deth Conselhèr de Trabalh e Indústria
		Er Ajuntament de Vielha rebrembe
		Naua captacion d'aigua de Vielha
	2	Adjudicacion des òbres deth nau estudi
		Jornades d'Educacion entara Salut
	3	Prepauses d'acòrd deth Plen der Ajuntament
		Corsi de manipuladors d'aliments
		Hèsta de Carnaval
	4	Corsi de léser e melhora professionau
		Es Pages Reiaus visiten eth CEIP Garona e era Escòla Mairau.
		Teatre en Vielha

Er Ajuntament de Vielha rebrembe

Entà ua melhor e mès igienica arremassada de lordères laguens deth nòste municipi, er Ajuntament de Vielha-Mijaran vò rebrembar a toti es vesins que:

- Es lordères s'an de depositar enes contenedorso a compdar des 22,00 or, e non ath long deth dia.
- Es lordères an d'anar laguens de bosses.

- Es bosses s'an de lançar laguens des contenedors.
- Ei proïbit lançar voluminosi (mòbles, electrodomestics,) enes contenedors des pòbles. Aguesti objèctes s'an de portar entara deishalleria, que i a plaçada en Pònt de Bèusa, dempús dera naua rotonda de Vilac, ath cant dera depuradora.

Naua captacion d'aigua de Vielha



Eth passat mes de Noveme, comencèren es trabalhs entà bastir era ampliacion dera captacion d'aigües de Vielha plaçada Enes Molinetes, qu'aurà uns 600 m de longada, damb er objectiu de remplaçar era que i a ara, entà poder arténher qu'era aigua qu'arribe en pòble non age patit en sòn origen cap tipe d'alteracion ja sigue pera carretèra o peth tunèl.

Es òbres les amie entà dauant era empresa COPASA, damb eth finançament d'UTE Túnel de Vielha.

Adjudicacion des òbres deth nau estudi

GISA (Gestió d'Infraestructures S.A.) a adjudicat es òbres de bastiment deth nau estudi de Vielha ara empresa "Construcciones, materiales y pavimentos S.A." (COMAPA), per un impòrt de 5.495.891 €, aportadi integrament peth Departament d'Ensenhament dera Generalitat de Catalonha, en tot auèr-les començat dejà.

Damb era finalitat de concentrar tota era activitat escolara en un madeish airau, e dada era sua proximitat respècte as installacions esportives, eth nau estudi se plaçarà ath cant der IES d'Aran, en un terren d'ua superfícia de 10.798,86 m² des quaus era bastissa en planta n'ocuparà 1.850.

Eth nau estudi aurà ua capacitat entà 725 alumnes, se traparà separada der IES d'Aran e aurà ua nautada de planta pati, planta baisha e dues plantes mès.



ENA PLANTA PATI, i traparam eth pati d'educacion primària a on i aurà es pistes esportives e se i accedirà per ua rampa; tanben i aurà plaçat eth gimnàs damb es sòns vestiaris, qu'aurà accés independent des der exterior, atau coma un burèu tar AMPA. Tanben i aurà un pati cubèrt plaçat ath dejós der edifici principau, damb dimension sufisenta tà que servisque coma pati de jòcs des aules de primària enes dies de mau temps.

ENA PLANTA BAISHA, i traparam es accèssi ara bastissa damb un vestibul e era administracion. Des deth vestibul gessen

es escales tà accedir a tot er edifici. Cau remarcar qu'era bastissa aurà un sistèma de rampes e ascensor tà permèter er accés a persones damb minusvalies.

En aguesta planta i aurà tres aules de P3, tres de P4 e tres de P5, damb es sòns respectius lavabos e eth pati infantil ath quau s'accedirà de manèra individuau des de cada ua des nau aules.

Tanben i aurà eth minjador e era codina (damb accés dirècte des deth carrèr mejançant ua rampa), era bibliotèca, era sala de professors, un espaci tà utilizar-lo coma pati interior tàs dies de mau temps, era aula de psicomotricitat, era de petits grops, era tutoria d'educacion infantil, es aules d'educacion especiau, un blòc de lavabos format per tres lavabos tà mainatges e tres entà mainades, dus tà professors e un espaci de neteja, e per miei d'ua rampa s'accedirà ath pati principau de primària, que coma auem dit se trape en un nivèu inferior.

ENA PRUMÈRA PLANTA, i aurà 9 aules de primària que son es de 1èr, 2au. e 3au., quate tutories, ua aula de plastica, ua de petits grops, era aula d'audiovisuals, e un blòc de lavabos damb distribucion parièra as dera planta baisha.

ENA DUSAU PLANTA, i aurà plaçades es autes 9 aules de primària que son es de 4au., 5au. e 6au., ua aula de plastica, ua de petits grops, era aula d'informatica e un aute blòc de lavabos.

Era sua execucion ei prevista en 24 mesi, a compdar deth 24 de deseme de 2004, data dera acta de replanteg.

Jornades d'Educacion entara Salut

Es dies 9 e 10 de deseme se desvolopèren en CEIP Garona de Vielha, es "Jornades d'educacion entara salut", organizades amassa entre eth Serviç Aranés dera Salut e es professors tutors des diuèrsi cicles. Es activitats realizades, an esta diuèrses:

CICLE INICIAU. Esdejoar en Casa: Aguesta activitat a coma finalitat reconèisher quini son es factors que distorsionen er esdejoar en casa e, a compdar deth talhèr e des activitats a desvolopar ath long de tot eth cors, arténher ua melhora enes abits e actituds dauant der esdejoar, autan enes escolans coma enes familhes.

CICLE MIEI: Alimentacion saludabla: talhèr dera crompa des aliments. Eth talhèr a coma finalitat, a compdar dera observacion des mancances des escolans e des sòns pròpis recorsi, desvelhar eth sòn interès pes aliments e ajudar-les a préner decisions en relacion as aliments dera sua pròpia eleccion.

CICLE SUPERIOR: Educacion sexual, vidèu: Activitat destinada a balhar informacion objectiua a mainatges e mainades, ajudar-les a acceptar eth sòn pròpi còs e es cambis que se produssissen en madeish, fomentar era autoestima e conèisher es valors des escolans en referéncia ara afectivitat, ath respècte e as relacions tamb era volentat de sajar de normalizar era adolescència a compdar deth dialòg.

Prepauses d'acòrd deth Plen der Ajuntament



th plen celebrat eth passat dia 16 de deseme, aprovèc iniciament:

APROBACION PUNTAU Num. 48 DES NORMES SUBSIDIÀRIES E COMPLEMENTÀRIES DE PLANEJAMENT DERA VAL D'ARAN, SECTOR "ES ANGLADES" e "PRAT DE BODIGUES".:

Que consistís en crear un nau sector de planejament, que permete obtier terren public entà garantir un nau accés tà Gausac, terren public entà plaçar un camp municipau de fòtbol, atau coma crear ua zòna de coishin verd que permete assegurar era discontinuïtat visuau des nuclèus urbans de Vielha e Gausac.

Aguesta prepausa serà a exposicion publica pendent un periòde d'un mes

APROBACION DERA MOCION SUS ES PERSONES DEPENDENTES.

Era Unió de Jubilats e Pensionistes UGT de Catalonha, a iniciat ua campanha entà que totes es institucions posse ath Govèrn der Estat a qu'elabòre ua lei de proteccion entàs persones dependentes.

D'acòrd damb açò sollicitud, eth Plen der Ajuntament de Vielha-Mijaran aprovèc:

- Demanar ath Govèrn der Estat que considèrè era proteccion as persones dependentes coma un dret universau e exigible e

qu'adòpte es mesures de besonh a favor d'ua proteccion especifica des persones damb dependència, damb tres èishi de responsa- seguretat social, sanitat e servicis sociaus- e tres nivèus de responsabilitat publica-estatau, autonmica e locau.

- Reivindicar eth reconeishement explicit entà qu'es institucions catalanes poguen desvolopar mecanismes complementaris entad aguesta prestacion social en marc d'un sistèma de proteccion social catalan mès apròp des besonhs des persones e des territòris.

- Compromèter eth conjunt des administracions publiques a arténher es objectius que seguissen:

a) A cuert tèrme atier eth 100% des besonhs des persones damb grana dependència.

b) A miei tèrme corbir es besonhs, ath torn, deth 75% des persones damb dependència moderada.

c) Fomentar era creacion d'un hilat sociosanitari basic que facilite era integracion, racionalizacion e optimizacion des recorsi e servicis actuaument existents.

d) Potenciar era ajuda a domicili, de qualitat e era "teleassistència", e proporcionar recorsi entà arténher qu'eth domicili abitau d'aguestes persones age es condicions de besonh d'abitabilitat, confòrt e servicis suficients que les permete eth nivèu mès naut possible d'autonomia personau.

e) Incrementar era aufèrta publica de places en centres de dia e residències assistides, e promòir era creacion d'abitatges tutelats e d'auti modèls residenciaus alternatius.

Corsi de manipuladors d'aliments



ntà totes aqueres persones as qui pogue interessar auer eth carnet de Manipuladors d'Aliments, poderatz arténher-lo ena Escòla d'Ostalria de Les, plaçada en C/ Des Banhs, en Les.

Er orari de resèrva e matricula serà de deluns a dijaus de 8.45 or. a 13.30 or, e de 15.00 or. a 17.00 or, e es diuendres sonque ath maitin.

Eth foncionament serà: 1 session presenciau de 3 ores

de durada, e 2 sessions non presenciaus a on se realizarà eth tèst en tot enviar-lo tath centre entara sua correccion.

Es dates de celebracion seràn: eth 16 de deseme de 2004, e pendent er an 2005 eth 20 de gèr, 17 de hereuèr, 17 de març, 14 d'abriu e 19 de mai, des 16.00 or. as 19.00 or.

Es corsí son de caractèr generau destinadi ara ostalaria e collectivitats, per tant entàs especifics de d'autes activitats calerà formar grop.

Hèsta de Carnaval



nguan en Vielha, celebraram era Hèsta de Magràs per auança. Degut a qu'eth dissabte de carnaval, ei a díder eth dia 5 de hereuèr, coincidís damb era Hèsta de Santa Gueta, e coma que volem que i age eth major nombre de participants possible enes dues Hèstes, er Ajuntament de Vielha-Mijaran a decidit celebrar era Hèsta de Carnaval eth dissabte dia 29 de gèr.

Era celebracion constarà d'un sopar entàs 22,00 or. en Otèl Tuca de Betren e tot seguit eth balh de Carnaval a cargue deth music Joan Inglada, ena Discotèca deth madeish

otèl. Toti aqueri que non volgatz vier a sopar, podetz vier a barar a compdar des 23,30 or., era entrada serà de franc.

Es tiquets deth sopar les poderatz comprar ena Oficina de Torisme de Vielha deth 12 ath 27 de gèr.

EI PLAN IMPORTANT CROMPAR ETH TIQUET PER AUANÇA, JA QU'ES PLACES SON LIMITADES E PER TANT NON SE VENERÀN TIQUETS ETH MADEISH DIA.

Corsi de léser e melhora professionau



ra Escòla d'Ostalària de Les a previst organizar tot un seguit de còrsi ath long der an 2005. Entà poder realizar es còrsi, serà de besonh un minim de 10 personas e tà matriculacion e mès informacion podetz adreçar-vos dirèctament ara Escòla, Tfn. 973 64 72 42 de 8.45 or. a 13.30 or. e des 15.00 or. a 17.00 or.

CORS BASIC DE PASTISSARIA E HORNERIA .

6 ores de durada . Dies 7,9,10 de hereuèr de 18.00 a 20.00 or. Prètz 30 €.

TALHÈR DE MASSA DE PIZZA E PASTA.

4 ores de durada. Dies 7 e 9 de març de 18.00 a 20.00 or. Prètz 24 €.

TALHÈR D'INICIACION ATH WORD

(Confeccion de cartes e menús) : 4 ores de durada. Dies 4 e 6 d'abriu de 17,00 a 19,00 or. Prètz 24 €.

TALHÈR DE CODINA VEGETARIANA.

4 ores de durada Dies 11 e 13 d'abriu de 18,00 a 20,00 or. Prètz 24 €.

TALHÈR DE "PETITS FOUR & CANAPÈS"

4 ores de durada. Dies 18 e 20 d'abriu de 18,00 a 20,00 or. Prètz 30 €

CORS DE CATA DE VINS E TABAC (a determinar)

CORS DE FRANCÈS BASIC (a determinar)

CORS D'ANGLÈS BASIC ENTARA OSTALARIA

(a determinar)

TALHÈR DE COCTELERIA BASICA (a determinar)

TALHÈR DE MONES DE PASCA.

4 ores de durada. Dies 14 e 16 de març de 18.00 a 20.00 or. Prètz 30 €

CODINA DAMB MICROONES

4 ores de durada. Dies 4 e 5 de mai de 18,00 a 20,00 or. Prètz 30 €

CORS DE GESTION D'ESTABLIMENTS DE TORISME

RURAU: de 10 ores de durada. Dies 4, 11, 18 e 25 d'abriu e 2 de mai, de 17,00 a 19,00 or. Prètz 100€.

Es Pages Reiaus visiten eth CEIP Garona e era Escòla Mairau.



th passat dia 22 de deseme, es pages des Reis d'Orient visitèren eth CEIP Garona de Vielha, a on arremassèren es cartes entàs Reis d'Orient.

Arribèren en elicotèr, e dempús d'auer escotat es desirs de toti es mainatges e mainades der estudi, se n'anèren entara Escòla Mairau era Cunhèra a on les demorauen toti es petits, en tot auançar-les quauqu'un des presents qu'eth dia 5 de gèr les portaràn es Reis d'Orient .



Teatre en Vielha



oma dejà vos informèrem "Teatre en Vielha", a premanit dejà eth calendari d'espectacles entàs quate prumèrs mès der an 2005, en tot aufrir era possibilitat d'auer un abonament entàs 4 sessions a un prètz de 40 €.

A compdar deth dia 3 de gèr s'an metut ara venda es abonaments entà toti aqueri que non auien era temporada passada, e poderàn comprar-les en Ajuntament de Vielha-Mijaran o ben dirèctament ena taquilha.

Eth prètz des entrades per auança serà de 12€ e se poderàn comprar ena Oficina de Torisme de Vielha, e eth madeish dia a un prètz de 14 €

Eth programa previst ei:

- | | |
|---------------|---|
| 13 de gèr: | "Catacrack". Òbra en catalan, interpretada per "La Baldufa". |
| 3 de hereuèr: | "Comiendo paredes". Òbra en castelhan, interpretada per "Las Muac". |
| 3 de març: | "Breve desconcierto breve". Òbra en castelhan, interpretada per "Los Modernos". |
| 7 d'abriu: | "1 X 2 ". Òbra en catalan, interpretada per "Sucre Salat Teatre". |

NÒTA: Se vòs participar en ERA CRASTA, ac pòs her en tot envià-mos era tua collaboracion ja sigue per corrèu ara adrèça AJUNTAMENT DE VIELHA c/ Sarriulèra 2, 25530 VIELHA, ben per Fax ath numerò 973 64 05 37 o ben per corrèu electronic, e-mail: ayuvielha@aranweb.com

D.L.: L-222-01

Dessenh: Alèxia Grustan. Val d'Aran 625 14 25 05